

dit-on, de voir celui qui a tout fait dans sa grandeur! Ne verray-je pas aussi, dit-elle, la bonne MARIÉ mère de Dieu: & comme on luy eut affeuré qu'elle la verroit, le luy diray, repliqua-elle, ce que ie luy ay tousiours dit d'un bon cœur. [70] *Ou kaouia IESVS Khisadkihitin.* Je vous ayme, ô la Mère de IESVS. Cette bonne ame lavée dans le sang de l'Agneau, prie maintenant pour la Nation, & pour tous ceux qui la secourent en quelque façon que ce soit.

Le vingt quatriesme du mesme mois, un Algonquain voulant mourir Chrestien, fut baptisé, & nommé Iacques. Après sa mort, en l'absence de nos Peres, le Capitaine de la Nation ayant esté gagné par un disné à decouvrir le lieu de sa sepulture, & permettre qu'on l'enleuast; comme on estoit à mesme, on fut contraint de desister sur les plaintes de quelques femmes, qui crioient à pleine teste, qu'on leur déroboit leurs morts. Il faut par fois condescendre à leur foiblesse.

Le trentiesme du mesme mois, les mesmes Peres baptiserent deux petits enfans, un garçon & une fille; comme ils demanderent au pere du petit garçon, s'il ne trouueroit pas bon qu'on fist à son enfant, ce qu'on faisoit aux enfans des François; il répondit fort sagement, Je vous ay trouué si bons, & si charitables, que ie ne croy pas que vous vouliez faire du mal à l'enfant, ayant fait du bien au [71] pere. Au commencement de cette Lune vous ayant amené mon fils aîné mort, pour l'enterrer à vostre façon, vous me répondites, que vous ne le pouviez faire, pource qu'il n'estoit pas Chrestien; ie ne desire pas que le mesme arriue à ce pauvre petit. De plus, comme le temps estoit fâcheux, & que ie ne pouvois m'en retourner